

Headlines

- 1 प्रधानमंत्री नरेंद्र मोदी होंरें अमरीकी राष्ट्रपति ट्रम्प होंरें गी आक्खी दित्ता ऐ जे पाकिस्तान कन्नै कुसै बी मुद्दे पर त्रीए धडे दी पैंची भारत गी कदें मंजूर नेई ते कुसै बी आतंकी हरकत गी परोक्ष युद्ध नेई जंग आहली कार्रवाई मन्नेआ जाग।
- 2 इस ब'रे दी अमरनाथें दी जात्तरा लेई कोई हैलीकाप्टर सेवा उपलब्ध नेई होग, श्रद्धालु पैदल जां घोड़ें पर जात्तरा करी सकदे न।
- 3 सरकार 15 अगस्त थमां टोल टैक्स दी समस्या गी दूर करने लेई त्रै ज्हार रपे सालाना फास्ट टैग पास दी सुविधा शुरू करोग।
4. मंत्री सकीना इत्तू होंरें जम्मू-कश्मीर च खुराक ते दोआइएँ दे म्यार गी बनाई रखने लेई समूलची सप्लाई प्रक्रिया पर तक्क रखने दा निर्देश दित्ता ऐ।
5. डोगरी लखारी पी.एल परिहार होंरें गी उन्दे कविता संग्रह "नन्ही टौर" लेई 2025 ब'रे दा साहित्य अकादमी बाल साहित्य पुरस्कार दित्ता गेआ ऐ।

<><><><><><>

PM-Trump

प्रधानमंत्री नरेंद्र मोदी होंरें अमरीकी राष्ट्रपति डोनाल्ड ट्रम्प होंरें गी साफ-साफ ते पूरी तगडेयाई कन्नै आक्खी दित्ता ऐ जे पाकिस्तान कन्नै अपने कुसै बी मुद्दें पर भारत नै कदें बी कुसै त्रीए धडे दी पैंची ना कदें स्वीकार कीती ऐ ते नां गै भविक्ख च इस चाल्ली दी दखल उसी मंजूर ऐ। अमरीकी राष्ट्रपति ट्रम्प हुंदे कन्नै 35 मिनटें तोड़ी फोन पर होई दी गल्लबात च मोदी होंरें आपरेशन सिंदूर दे बारै च चर्चा कीती। इस दौरान मोदी होंरें इब्बी साफ करी दित्ता जे पिछले दिनें भारत ते पाकिस्तान बश्कार पैदा होई गेदी सैन्य कार्रवाई आहली स्थिति गी खत्म करने लेई भारत ते अमरीका बश्कार बपार बारै जां अमरीका दी दखल या पैंची बारै बी कोई गल्लबात नेई होई ही। इस गल्लबात बारै जानकारी सांझी करदे होई विदेश सचिव विक्रम मिसरी होंरें जोर देइयै आखेआ जे भारत आतंकवादी कारवाइएँ गी परोक्ष युद्ध नेई सिद्दे लड़ाई आहली कार्रवाई मन्नोग।

<><><><><><>

No Helicopter

श्री अमरनाथ श्राइन बोर्ड नै यात्रुएं लेई इक नमी अपडेट जारी करदे होई एहू घोषणा कीती ऐ जे इस बरे अमरनाथ यात्रा दौरान हेलीकाप्टर सेवा उपलब्ध नेई होग। सरकार दे हुक्म दी पालमा करदे होई इस बरे पहलगाम ते बालटाल बश्कार दे सब्बने यात्रा दे दस्तें गी 1 जुलाई शा 10 अगस्त तगर नो फ्लाइंग जोन्स घोषित करी दित्ता गेआ ऐ। यात्रु इस बरे श्री अमरनाथ यात्रा जा ते पैदल जां घोड़े खच्चरें राएं करी सकडन। श्राइन बोर्ड नै यात्रुएं गी दिशा-निर्देश गी ध्याना च रखदे होई यात्रा करने लेई गलाया ऐ। यात्रा सरबंधत होर जानकारी तुस श्री अमरनाथ श्राइन बोर्ड दी वेबसाइट शा हासिल करी सकदे ओ।



Amarnath-Preparations

जम्मू-कश्मीर च औंदी 3 जुलाई गी शुरू होने आहली श्री अमरनाथ जात्तरा लेई तैयारियां जोरें उप्पर चला'रदियां न। जिला प्रशासन यात्रा गी सुचारू ते सुरक्षित तरीक कन्नै सम्पन्न कराने लेई लोडचदी तैयारियें गी मुकदा रूप देआ'रदा ऐ। यात्रुएं दी भीड़ गी काबू च रखने लेई ते यात्रा दौरान कनून बवस्था बनाई रखने लेई सुरक्षा दे तगड़े उपाऽ कीते जा'रदे न। ट्रैफिक पुलस दी तैनाती कीती जा'रदी ऐ ते सब्बने एजेंसिएं बश्कार तालमेल बनाइयै कम्म कीते जा'रदे न। अमरनाथ यात्रा शा पैहले जम्मू दे राम मंदरै दे दर्शन करने लेई देश दे बक्ख-बक्ख हिस्सें थमां साधुएं इत्थे औना शुरू करी दित्ता ऐ जेदे मद्देनजर उन्दे रौहने ते खाने-पीने दी पूरी बवस्था कीती जा'रदी ऐ।



Fast-Tag

सरकार इस बरे 15 अगस्त थमां 3 ज्हार दी लागत आहले फास्ट टैग आधारित सालाना पास दी सुविधा प्रदान करोग जेदे कन्नै लोक घट्ट खर्चे कन्नै देश दे कुसा बी हिस्से दा सफर बिजन कुसा परेशानी दे करी सकडन। एहू पास निजी गड्डियें जियां कारें, जीपें, वैनें लेई विशेष सुविधा प्रदान करोग।



Maharaja-Gulab Singh

डोगरा विरासत ते इतिहास गी इक यादगार श्रद्धांजलि अर्पित करदे होई कल अखनूर दे जिआ-पोता घाट च महाराजा हरि सिंह हुंदे राज तिलक समारोह दे चेत्ते च इक कार्यक्रम दा आयोजन कीता गेआ। 1822 ब'रे च महाराजा रंजीत सिंह होरें गुलाब सिंह हुंदा राज्याभिषेक करियै उनेंगी जम्मू दा शासक नियुक्त कीता हा। प्रोग्राम दा आयोजन राज तिलक गी मनाने आहली कमेटी आसेआ कीता गेआ जेदे च गुरुबाणी, पूजा-पाठ ते फुल्लें दी श्रद्धांजलि अर्पित कीती गेई। इस मौके डोगरा शासक दे स्थापक महाराज गुलाब सिंह होरें गी नौजोआनें मन्ने-परमन्ने दे लोकें ते सांस्कृतिक संगठनें आसेआ श्रद्धांजलि अर्पित कीती गेई।



Itoo

सेहत ते मेडिकल शिक्षा मंत्री सकीना इत्तू होरें श्रीनगर दे सिविल सैक्टरेट च इक मीटिंग दी प्रधानता करदे होई जम्मू-कश्मीर च खुराक ते खाने-पीने आहली चीजें दे म्यार पर तक्क रखने सरबंधी संगठन डी.एफ.एल.ओ दी कम्में-कारवाइयें दा जायजा लैता। मीटिंग दौरान मंत्री होरें जम्मू-कश्मीर च दोआइएं ते खाने-पीने आहले समेयान दी गुणवत्ता उप्पर तक्क रक्खने च संगठन आसेआ कीते जा'रदे कम्में दा जायजा लैता। उनें दोआइएं ते खाने-पीने आहले समेयान दी सप्लाई उप्पर नेड्डी तक्क रक्खने लेई गलाया ते आखेआ जे लोकें दी सेहत उप्पर कोई समझौता नेई कीता जाग।



Sahitya-Academy

साहित्य अकादमी नमीं दिल्ली आसेआ 2025 ब'रे लेई साहित्य अकादमी बाल साहित्य पुरस्कारें दी घोषणा करी दित्ती गेई ऐ जेदे च डोगरी भाशा च एह पुरस्कार पी.एल परिहार "शौक" होरें गी उन्दे काव्य संग्रह "नन्ही टोर" लेई दित्ता गेआ ऐ।



Gram-Utkarsh

राजौरी जिले च जनजातीय समुदाय दे लोकें धरती आबा जनजातीय ग्राम उत्कर्ष अभियान तैहत सरकारी स्कीमें दे बारै च जागरूकता फैलाने लेई जिला प्रशासन दा आभार प्रगट कीता ऐ। इस अभियान दा मकसद जनजातीय समुदाय दे जीवन स्तरै गी उबड़ा चुक्कने लेई सरकार आसेआ शुरू कीती गेदिएं स्कीमें दे बारै च जानकार बनाना ऐ तां जे ओहू उंदा पूरा-पूरा फैयदा ठोआई सकन। मकामी लोकें जिला प्रशासन दी उन्दे तगर पुज्जियै उनेंगी इनें स्कीमें बारै दस्सने लेई सिफत कीती ऐ।



Special Feature 11 Years

11मां अंतरराष्ट्री योग दिवस इस हफ्ते मनाया जाग। आकाशवाणी समाचार योग बारै इक खास फीचर लेइयै आया ऐ जेदे च भारती परम्परा थवां हुन तगर ऐसे वैश्विक अभियान बनने बारै दी यात्रा गी दर्शाया गेआ ऐ। भारती संस्कृति च रचे-बसे दा योग अज्ज पूरी दुनिया च अपनाया जा'रदा ऐ जेदे थवां पतंजलि दे सूत्रें ते आधुनिक गुरूएं योग गी अग्गे पजाया ऐ। 2014 च संयुक्त राष्ट्र आसेआ इसी अपनाने ते 21 जून गी पूरी दुनिया च इसी अंतरराष्ट्री दिवस मनाने दी इक यात्रा जारी ऐ। प्रधानमंत्री नरेंद्र मोदी होरें इस बारै प्रस्ताव पेश कीता हा जिसी अपनाई लैता गेआ। अज्ज योग सेहत गी बढ़ावा देने, आपसी सौहार्द ते आत्म शांति आहली भेठा लोकें गी लेई जा करदा ऐ।



Pre Yoga Day Announcement

आकाशवाणी जम्मू दा क्षेत्रीय समाचार एकांश अंतरराष्ट्रीय योग दिवस दे सरबंध्यै च 20 जून गी 20 मिनटें दा इक खास कार्यक्रम पेश करा'रदा ऐ। एहदा प्रसारण शुक्रवारें बडुलै 9 बज्जियै 30 मिनटें पर कीता जाग। कार्यक्रम च स्हाडे परौहने होडन मन्ने-परमन्ने दे योग माहिर ते नेचरोपैथ डॉ. नीलम शर्मा। ओहू योग दे स्हाडे जीवन च महत्व बारै अपने विचार सांझा करंगन। इस परिचर्चा दी मेजबानी करंगन स्हाडियां न्यूज एंकर श्रुति खजुरिया। इस कार्यक्रम गी स्हाडे श्रोता मीडियम मीडियम वेव 303 मीटर यानि 990 किलोहर्टज ते एफएम 100.3 मेगाहर्टस पर सुनी सकदे ओ।



Weather

जम्मू-कश्मीर च अँदे किश दिनें दौरान मौसमी हालात रले-मिले दे रौहने दी मेद दस्सी गई ऐ। मौसम विभाग दा आखना ऐ जे 20 जून तोड़ी मौसम आम तौरा पर खुशक रौहने दे असार न, पर खुशक रौहने दे असार न पर किश टामी-टामी थाहरें इस दौरान हल्की बरखा बी पेई सकदी ऐ। जम्मू प्रांतै दे किश हिस्सें च 21 ते 22 जून गी हल्के कोला भारी दर्जे दी बरखा दे बी इमकान न। करसाने गी सलाह दिती जंदी ऐ जे ओहू 20 तरीक तोड़ी खुशक मौसम दे चलदे राई-बाई सरबंधी अपनियां गतिविधियां जारी रक्खी सकदे न, जदूं तगर बरखा नेई बरदी।

<><><><><><>

Volleyball

पुंछ च डिग्री कॉलेज ग्राउंड च शहीद डीएसपी मंजीत सिंह मेमोरियल वॉलीबॉल क्लब आसेआ जिला स्तर दे वॉलीबॉल टूर्नामेंट दी शुरूआत कीती। एहदा उद्घाटन एएसपी मोहन शर्मा होरें कीता।

<><><><><><>